



Il podest da la categoria arma da sport duas posiziuns: Georg Maurer, Domenic Lorenzetti e Cornelia Valentin (da san.). FOTOS G. N. STGIER

Noss matscheurs èn gia en furma

Uniun chantunala da tir dal Grischun

■ **Cun l'occurrènz d'avertura a Cuira è la stagiun da tir 2018 lantschada. Las relaziuns optimalas han pussibilità als participants da far buns resultats. Hubert Tomaschett, il manader dals matscheurs grischuns, è cuntent cun las prestaziuns da ses tiradurs.** La stagiun da tir 2018 sin las distanzas da 300 meters, da pistola e da las armas 50 meters ha cumenzà sonda passada a Cuira ed a Landquart. Suentar la pausa d'enviern èn ils megliers tiradurs grischuns s'entupads al stan da tir Rossboden a Cuira per l'emprima concurrenz interna sin la distanza lunga. Quella ha lura mussà che noss matscheurs èn pronts per la stagiun ed er per la Festa chantunala da tir 2018 che ha lieu en dus mais en Surselva.

Nov record grischun
Las relaziuns èn stadas bunas uschia ch'ils tiradurs han discurre d'ina occurrenz correcta e cun ina buna vista. Tratg precis ha lura cunzunt *Hansruedi Giger* da Tumeigl cun far 578 puncts cun l'arma da militar en vender. Ses resultat excellent è a medem mument er in nov record grischun. Fin sonda passada era *Urs Nauli* da Tumeigl il purtader da quel record chantunal e quai cun 577 puncts. Tar il tir d'avertura actual ha el fatg 574 puncts e vegnì segund. Terz e daventà cun 571 puncts *Alessandro Rota* da Vicosoprano. Cun 564 puncts è *Robert Studer* da Castrisch be vegnì 5avel, in plaz che na correspunda segir betg a ses potenzial ed a

sia qualitat. L'occurrènz duas posiziuns cun l'arma d'ordonnanza ha gudagnà *Walter Widmaier* da Schiers/Aschera cun 531 puncts. Il terz plaz ha cuntanschì *Peter Jemmi* da Castrisch e quai cun 509 puncts, in resultat ch'è per el bain plitost magher.

Danovamain Urs Brazero
Ferm ha lura sajettà *Urs Brazero* da Farrera en la concurrenz arma da sport en vender. Suentar ils 60 sajets sin la schiba da 10 ha el scrit 591 puncts. Cun quel resultat da vaglia ha el danovamain gudagnà quella categoria sco gia il 2017.



Betg anc en furma para d'esser Peter Jemmi, il tiradur da Castrisch.

Meinrad Monsch, il matscheur da Zezras, ha tratg 581 puncts e vegnì sin plaz 2. Tar la categoria arma da standard duas posiziuns sa numna il victur *Domenic Lorenzetti*. Il tiradur da Cuira ha sajettà 571 puncts, trais dapli che *Georg Maurer* da Favugn sco segund.

Sco adina Elmar Fallet
Da la partida al tir d'avertura èn er stads ils pli fermes tiradurs da pistola da noss chantun. Tar quels tutga cunzunt *Elmar Fallet* da Müstair. Il campion svizzer 2017 da la distanza 50 meters, er el para gia d'esser bain en furma e pront per la stagiun. A Cuira ha il pur da 47 onns gist declassà ses concurrents cun sajettar 571 puncts. *Tim Wolf* dal Partenz, sco segund, perda tutina 24 puncts sin il grond victur. Cumpletà il podest ha *Guido Zellweger* da Zernez grazia a ses 545 puncts.

Victoria per Coccia – plaz 2 per Tomaschett
Tratg lur program da 50 meters cun l'arma da caliber pitschen han ils tiradurs e las tiraduras a Landquart. Las duas concurrenzas da l'elita ha gudagnà *Lars Färber* da Favugn. En la categoria trais posiziuns è *Elena Tomaschett* da Rabius vegnida terza cun il resultat da 572, damai be dus puncts pli pauc ch'il victur. *Andri Tomaschett* da Trun è i cun la medaglia da bronz. Las categoiras dals giuven han gudagnà en vender *Tino Coccia* da Rueun e la concurrenz da trais posiziuns *Natasha Bischof* da Mastrils.



È cuntent cun las prestaziuns da ses umens: Hubert Tomaschett, il manader dals matscheurs grischuns.



Urs Brazero è danovamain stà sisum il podest tar l'occurrènz da sonda passada.



Tratg bain ha er Elena Tomaschett, la Sursilvana e commembra dal cader naziunal arma 50 meters.



Nagina concurrenz ha già Elmar Fallet.



In plaz da podest dapli per Guido Zellweger.



Tino Coccia, il victur arma 50 meters en vender tar ils giuven.